

“Te anter i tobié” se tol na paussa

L Comitad Manifestazions de Cianacei à mudà direzion: Marco Dellantonio à tout l post de Dominik Vigl e con la sociazions l'é stat dezidù de sutèr n an

Cianacei - Mudaments a cef del Comitad Manifestazions Canazei Events e per chel che vèrda l'endrez de una de la maor festes de l'istà a Cianacei.

Prum de dut l'é da uzèr fora che da oril de chest an la redenes del Comitad Manifestazions é passèdes da Dominik Vigl, che à dat sia demiscions per empegnes de familia ajache l'à abù doi jomelines, a Marco Dellantonio che l'é ence conseier de Comun.

L nef Comitad Manifestazions se à troà più outes via per chesta aisciuda con l Comitad de endrez de la festa “Te anter i tobié” e i raprezentanc de duc i gropes de volontariat per pissèr de endrezèr n'otra edizion del cognosciù event che vegn metù a jir te la pèrt veia de Cianacei oramai da passa 20 egn.

“Acà trei setemènes aon chiamà ite duc i raprezentanc de la sociazions – à dit l president Dellantonio – per veder se zachei se tolea sù l'encèria de ge stèr dō a l'endrez de la festa ajache Danilo Planchensteiner, che



Forgian ve dèsc apuntamento a l'istà 2019.

l'era l president, e Dominik Vigl, vize president del comitat, no se la sentia più de jir inant, vedù la critiches che l'era vegnù fora l'an passà. La festa aea perdù mingol l sens originèl per chel che la era nasciuda per via che ades l'é restà demò doi tobié da poder

durèr e dapò l'era doventà dut demò magnèr e beiver e pecia cultura. Ai 28 de mé aon chiamà ite na seconda outa ma nesciugn se à metù dant, coscità duc ensema aon dezidù de se tor na paussa. Ogne sociazion se à tout l'empegn de troèr na persona che fae pèrt del nef comitat per l'endrez de la festa che aboncont per l 2019 mudarà deldut endrez, ence l'inom. Anter la persones che se metarà dant vegnarà chieri fora ence l nef president.

Per chest an al post de “Te anter i tobié” vegnarà endrezà na defilèda de ciavai fora per paisc e na net magica con spetacol e divertiment.

“Ge daron “neva vita” a chesta festa – à fat a saer Dellantonio – che no l'é demò folclor ma l'é la “nona” de la festes de Cianacei. Stajé ben donca a messèl del 2019, duc ensema, più ciarié e engaissé che zenza!” (mci)



L passaje de encèria anter Marco Dellantonio e Dominik Vigl.